

Na osnovu člana 130. Zakona o radu ("Službene novine Federacije BiH", br.43/99, 32/00 i 29/03) i čl. 1. i 2. Protokola potpisanog 25.01. 2002. godine između Saveza samostalnih sindikata Bosne i Hercegovine i Vlade Federacije Bosne i Hercegovine o načinu uspostave Ekonomsko - socijalnog vijeća za teritoriju Federacije Bosne i Hercegovine, Savez samostalnih sindikata Bosne i Hercegovine, Vlada Federacije Bosne i Hercegovine i Udruženje poslodavaca Federacije Bosne i Hercegovine, zaključuju

SPORAZUM
o osnivanju Ekonomsko - socijalnog vijeća za teritoriju Federacije Bosne i Hercegovine

(Prečišćen tekst)

Član 1.

Ovim sporazumom Savez samostalnih sindikata Bosne i Hercegovine, Vlada Federacije Bosne i Hercegovine i Udruga poslodavaca Federacije Bosne i Hercegovine (u daljem tekstu: socijalni partneri) osnivaju Ekonomsko - socijalno vijeće za teritoriju Federacije Bosne i Hercegovine (u daljem tekstu: ESV) kao najviši institucionalni oblik za vođenje tripartitnog socijalnog dijaloga.

Član 2.

Ovim sporazumom utvrđuju se principi djelovanja ESV, sastav, način odlučivanja, djelokrug rada i nadležnosti ESV.

Član 3.

ESV svoje djelovanje zasniva na principima :

- vođenja socijalnog dijaloga kao sistema za rješavanje odnosa između socijalnih partnera i sredstva za postizanje ravnoteže između tržišne ekonomije i socijalne pravde,
- poštivanja nezavisnosti i autonomije socijalnih partnera u njihovom radu i organiziranju,
- osiguranja slobodnog pristupa adekvatnim i blagovremenim informacijama i dokumentaciji značajnoj za pitanja o kojima odlučuje ESV,
- poštivanja i provođenja odluka i zaključaka ESV.

Član 4.

ESV kao najviše tripartitno tijelo na teritoriji Federacije Bosne i Hercegovine osniva se radi vođenja zajedničke djelatnosti socijalnih partnera u oblasti ekonomske, socijalne i razvojne politike, afirmacije i zaštite ekonomskih i socijalnih prava, odnosno interesa zaposlenika i poslodavaca, razvijanja sistema kolektivnog pregovaranja i zaključivanja i primjene kolektivnih ugovora, te u tom smislu ESV:

- prati, razmatra i ocjenjuje utjecaj ekonomske i socijalne politike i mjera ekonomske i socijalne politike na razvoj i socijalnu stabilnost,

- razmatra, podstiče zaključivanje i ocjenjuje primjenu kolektivnih ugovora i s tim u svezi dostavlja informacije i obrazloženja ministarstvu nadležnom za rad,
- podstiče mirno rješavanje kolektivnih radnih sporova,
- predlaže Vladi, poslodavcima i sindikatima vođenje usklađene politike cijena i plata,
- potiče ideju tripartitnog, bipartitnog i drugih oblika socijalnog dijaloga na svim nivoima u rješavanju ekonomskih i socijalnih pitanja i problema,
- prati, razmatra i predlaže eventualne promjene zakona od utjecaja na ekonomski i socijalni razvoj i u tom kontekstu položaj zaposlenika i poslodavaca ; razmatra nacрте zakona, podzakonskih akata, programa i drugih dokumenata iz djelokruga svog rada i svoja mišljenja o tim dokumentima dostavlja Vladi Federacije Bosne i Hercegovine i Parlamentu Federacije Bosne i Hercegovine,
- prati primjenu zakona i ostvarivanje prava iz oblasti rada i socijalne sigurnosti i predlaže nadležnim organima i institucijama mjere za ostvarivanje i unaprjeđivanje tih prava,
- bavi se problemima provođenja procesa privatizacije i predlaže nadležnim institucijama eventualne izmjene zakonskih i podzakonskih akata koje bi doprinijele većim finansijskim efektima i zapošljavanju,
- prati stanje na području zapošljavanja, penzijsko - invalidskog i zdravstvenog osiguranja i u tom kontekstu vodi aktivnosti na smanjenju crnog tržišta radne snage,
- podstiče aktivnosti na većoj efikasnosti nadležnih institucija sistema na sprječavanju korupcije, s ciljem da se ona pretvori u visoko - rizičnu i nisko - profitnu djelatnost.

ESV donosi Poslovnik o svom radu.

Član 5.

Socijalni partneri su saglasni da će radi daljeg razvoja i unaprjeđivanja kolektivnog pregovaranja i provedbe kolektivnih ugovora i ugovora o radu razvijati i međusobne bipartitne odnose na svim nivoima organiziranja socijalnih partnera.

Član 6.

ESV ima 21 člana, po 7 (sedam) od svakog socijalnog partnera.

Socijalne partnere predvode, ispred Vlade Federacije Bosne i Hercegovine, premijer, ispred Udruženja poslodavaca Federacije BiH, predsjednik i ispred Saveza samostalnih sindikata Bosne i Hercegovine, predsjednik.

ESV može punovažno raditi i odlučivati ako mu prisustvuje najmanje četiri člana od svakog socijalnog partnera.

Svaki socijalni partner samostalno imenuje i opoziva svoje članove.

Član 7.

Kada su na dnevnom redu zakoni čiji je obrađivač ministarstvo koje ima predstavnika u ESV, sjednici obavezno prisustvuje ministar –član ESV.

Član 8.

Svi predstavnici jednog socijalnog partnera imaju u ESV jedan glas. Odluke se donose konsenzusom socijalnih partnera.

Prilikom glasanja socijalni partneri glasaju odvojeno i o rezultatima svog glasanja izvještavaju ESV.

ESV može odlučiti da svi socijalni partneri glasaju zajedno kada se radi o proceduralnim i tehničkim pitanjima.

Svaki socijalni partner ima mogućnost i pravo da izrazi svoje vlastito mišljenje o zaključcima i odlukama ESV.

Član 9.

ESV ima predsjednika i tri potpredsjednika.

Predsjednika ESV socijalni partneri biraju iz reda istaknutih javnih, naučnih, privrednih i kulturnih radnika.

Predsjednika može predložiti bilo koji socijalni partner u ESV, a bira se konsenzusom svih socijalnih partnera.

Predsjednik ESV nema pravo glasa, a bira se na mandatni period od četiri godine, uz mogućnost ponovnog biranja, bez ograničenog broja mandata.

Predsjednika u slučaju njegove odsutnosti zamjenjuje jedan od potpredsjednika.

Član 10.

Predsjednik ESV:

- predstavlja ESV,
- saziva sjednice i utvrđuje prijedlog dnevnog reda za sjednice ESV,
- nadzire izvršavanje odluka i zaključaka ESV,
- i obavlja i druge poslove koje mu povjeri ESV.

Član 11.

ESV održava svoje redovne sjednice najmanje jednom u 90 dana. Predsjednik ESV dužan je sazvati sjednicu na zahtjev ESV ili jednog od socijalnih partnera.

Član 12.

U radu ESV mogu učestvovati i neovisni stručnjaci iz različitih oblasti kao stalni savjetnici bez prava glasa.

ESV može za potrebe svoga rada angažirati različite institucije, stručne organizacije i eksperte.

Na svoje sjednice, zavisno od pitanja koja se razmatraju, ESV može pozivati stručnjake iz tih oblasti, predstavnike sindikata i poslodavaca koji nisu zastupljeni u ESV.

Član 13.

ESV može osnivati povjerenstva za pojedina pitanja iz djelokruga svog rada, a naročito za:

- politiku plaća i kolektivnih ugovora,
- porezni sistem, zapošljavanje i socijalnu politiku,
- privatizaciju,
- zakonodavstvo, provođenje propisa i ostvarivanje zaštite prava,
- javne djelatnosti,
- entitetske i međunarodne odnose,
- poticaj izvoza,
- politiku stranih ulaganja,
- standardizaciju,
- međunarodni transport,
- energetska politiku.

Mišljenja koja daju povjerenstva o određenim pitanjima obvezno se prezentiraju ESV prilikom razmatranja tih pitanja na ESV.

Povjerenstva obavezno jednom godišnje podnose izvještaj o svom radu ESV.

Član 14.

Svaki socijalni partner samostalno imenuje svoje članove povjerenstva. Socijalni partneri imenuju jednak broj članova u svako povjerenstvo. Rukovodioci povjerenstva biraju se iz reda članova ESV.

Odlukom o formiranju povjerenstva utvrđuje se djelokrug i način njihovog rada.

Član 15.

Stručne, organizacijske, tehničke i materijalne uvjete za rad ESV osigurava i snosi njihove troškove Vlada Federacije Bosne i Hercegovine, a poslovi za ESV obavljaju se u Federalnom ministarstvu rada i socijalne politike.

Za obavljanje organizaciono-tehničkih poslova za potrebe ESV, može se organizovati Sekretarijat Ekonomsko-socijalnog vijeća.

Član 16.

Sjedište ESV je u Sarajevu, u sjedištu Ministarstva rada i socijalne politike.

Član 17.

Socijalni partneri se obvezuju da u roku od 15 dana od dana stupanja na snagu ovog sporazuma imenuju svoje predstavnike u ESV i da se ESV konstituiraju najkasnije u roku od 30 dana od dana stupanja na snagu ovog sporazuma.

Član 18.

Prečišćen tekst Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine obuhvata: Sporazum o zaključivanju sporazuma o osnivanju Ekonomsko-socijalnog vijeća za teritoriju Federacije Bosne i Hercegovine („Službene novine Federacije BiH“, br. 47/02) Sporazum o izmjenama i dopunama Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine („Službene novine Federacije BiH“, broj 42/03), Sporazum o izmjenama i dopunama Sporazuma o osnivanju Ekonomsko-socijalnog vijeća za teritoriju Federacije Bosne i Hercegovine („Službene novine Federacije BiH“, br 8/08), i Sporazum o izmjenama i dopunama Sporazuma o osnivanju Ekonomsko-socijalnog vijeća za teritoriju Federacije („Službene novine Federacije BiH“, br.13/08, 51/08 i 10/11),u kojima su naznačeni dani stupanja na snagu tih sporazuma.

Predsjednik ESV-a

Edhem Biber

Broj:03-34/19-2215/10
Sarajevo, novembar 2011.godina